

## ODIL YOQUBOV ROMANLARIDA UCH DO`ST ARXETIPI

**Fotima Mamtaliyeva**

Andijon davlat pedagogika instituti,  
“O`zbek tili va adabiyoti” kafedrası o`qituvchisi  
<https://doi.org/10.5281/zenodo.7185600>

Arxetip tushunchasini ommalashtirgan psixolog Karl Yung ta`limotiga ko`ra, arxetiplar insoniyat xotirasida “kollektiv ongsizlik” tarzida yashashi va ijod jarayonida turli shakllarda namoyon bo`lishi bilan xarakterlanadi. Demakki, kishilik jamiyatining eng ibtidoiy davrlarida paydo bo`lgan arxetipni muayyan ijodkor o`z davri xususiyatlari bilan boyitadi, natijada “ilk asos”ga ega bo`lgan motiv turli ko`rinishlarda asardan asarga ko`chib yuradi [1,37].

Odil Yoqubovning “Er boshiga ish tushsa...”, Oqqushlar, opppoq qushlar” romanlarida uchraydigan uch do`st, uch og`ayni arxetipi ildizlari xalq og`zaki ijodidagi ertaklarga borib taqaladi. O`zbek xalq ertaklaridan “Cho`loq bo`ri”, “Qilich qora”, “Uch og`ayni botirlar”, jahon ertaklaridan “Etik kiygan mushuk”da ayni shu arxetip namunalarini ko`ramiz. Ushbu ertaklarda, asosan, uch aka-ukaning turli sinovlarga uchrashi va kenja botirning sinovlardagi mardona jasorati, dovyurakligi aks etadi.

60-yillarda yaratilgan “Er boshiga ish tushsa...” romanida uch do`st obrazi arxetipik personajga xos shiddatli, jasur, mavjud voqelikka qarshi tura oladigan qahramonlardir. Romanda II jahon urushi davrida front ortidagi hayot 16-17 yoshli yigitlar – Mashrab, Qo`chqor, Akmalning do`stligi, haqiqat uchun kurashi, samimiy muhabbatiga yo`g`rilgan holda tasvirlangan. Ushbu arxetipning folklor bilan bog`liq yana bir jihati, roman personajlarining ertak qahramonlari singari qiyinchiliklar girdobida qolishidir. Har uchala yigitning otasi sho`ro hokimiyati uchun halol mehnat qilgani holda, bunga yarasha mukofot olmagan ortidan sodir bo`lgan vaziyat ularni yanada jipslashtiradi. Mashrabning otasi A`zam yacheyka yurt oldidagi xizmatlari hisobga olinmagani, Ertoev kabi tuban kimsalarning tuxmati sabab vafot etadi, Qo`chqorning otasi Qilich – A`zam yacheykaning do`sti xotini Fotimaning xiyonati sabab qishloqni tark etadi. Akmalning otasi Eshmat – Eshvoy Ertoevning xiylasi bilan frontga ketadi. Oilasi boshiga tushgan mushkulot hamda front ortidagi og`ir mehnat ularning do`stligini mustahkamlaydi.

Yozuvchi har bir qahramonning individual harakterini ta`kidlagan holda (Mashrabdagi shoir-u devonalik, Qo`chqordagi cho`rtkesar-chapanilik, Akmalning oilaparvarligi) ularga xos umumiy jihatlar (mehnatsevarlik, qiyinchilikdan qo`rqmaslik)ni voqealar rivoji davomida aks ettirib borgan. Ertaklarda og`aynilar qaroqchilar, dev-u ajdarlarga qarshi kurashgani kabi



romanda uch do'st Ertoev va chavandozga qarama-qarshi bo'ladi. Ertoev va Xolmat chavandoz boshliq kishilar xalqning g'allasini o'marishi, o'z yaqinlarini frontdan olib qolish uchun soxta hujjatlar bilan boshqalarni yuborishi Mashrab va uning ikki og'aynisi yordamida fosh bo'ladi.

Adabiyotshunos Jabbor Eshonqul "kenjatoylar ertak va dostonlarda akalaridan ayricha yo'l tutadigan va hamisha noan'anaviy fikrlaydigan personaj" ligini ta'kidlaydi [2,103]. Darhaqiqat, dunyo folklorida kenja o'g'il tipidagi qahramonlar o'zlarining mardona harakati sabab ajralib turadilar. Mashrabning shoirtabiatligi, do'stlari Akmal va Qo'chqordan bir yoshga kichikligi, shunday bo'lsa-da, yoshini katta yozdirib birga frontga ketishi uni kenja botir tipidagi qahramonga tenglashtiradi va Mashrabni roman bosh qahramoni darajasiga ko'taradi (ushbu epizod muallifning hayotidan olingani bilan ahamiyatli).

Roman so'nggida Qo'chqor va Mashrabning urushga, Akmalning o'qishga ketishi yigitlar uchun yangi sinovlar boshlanishini bildiradi.

Qisqa qilib aytganda, Odil Yoqubov xalqning og'ir kunlardagi hayotini inson umrining navqiron davri misolida tasvirlaydi. Bu davrda topish-yo'qotish, ayriliq, kechirish, muhabbat, vijdon kabi tushunchalar insonni to'g'ri yo'lga yetaklaydi.

Yozuvchining "Oq qushlar, oppoq qushlar" romanida esa uch do'st arxetipining yana bir o'zgargan varianti uchraydi. Mazkur asarda frontda bir-birini suyagan, umrbod do'st bo'lishga qasamyod qilgan Shorahim shovvoz, Muzaffar Farmonov, Rasul Nuriddinovlarning keyingi hayot yo'li tasvirlanadi. Amaldor, olim, bog'bonga aylangan uch jo'ra turli yo'llarni tanlagan bo'lsa-da, taqdir ularni yana bir-biriga ro'baro' qiladi.

Hayot daryosining turli o'zanida suzib yurgan do'stlar farzandlar manfaati sabab o'zaro teskari bo'lib qoladi.

Urushda Muzaffarni qutqargan, uni Gobi sahrosidan opichlab o'tgan Shorahim shovvoz aynan Muzaffarning o'g'li Fotihning nopok ishlari sabab aziyat chekadi. Muzaffar qarshisida ikki yo'l turadi – yo do'sti – haqiqat tomon bo'lish kerak, yoki o'g'li – obro', amal tomon bo'lish. U busiz ham gullab-yashnagan davri so'nib borayotganini teran tushunadi. O'g'lining harakatlari bu jarayonni tezlashtiradi. Yozuvchi ilm – mansab qarama-qarshiligini Rasul – Muzaffar konflikti, xarom – halol kurashini Muzaffar – Shorahim qarama-qarshi obrazlari yordamida aks ettirgan.

Ushbu personajlarning keyingi hayot yo'lida yuz bergan voqealar realistik asarga xos bo'lib, barcha inson ham mansab, amal pillapoyalaridan ko'tarilib



borgan sari oʻzidagi insoniylik, mehr, halollik tuygʻularini saqlab qola olmasligi ishonarli tasvirlangan.

Shorahimning oilasidagi yoʻqotishlar, Rasulning ilmiy faoliyatidagi toʻsiqlarga Muzaffar Farmonov sabab qilib koʻrsatiladi. Bunda tuzum emas, balki yuqori mansabdagilar aybdorligi gʻoyasi ilgari suriladi. Bu haqda adabiyotshunoslar quyidagi fikrlarni bildirgan: “Oʻtgan asrning 70-yillari davomida va 80-yillar boshlarida oʻzbek adabiyotidagi tendensiyaga koʻra, ijtimoiy muammolarning ildizlari tuzum mohiyatiga emas, ayrim amaldorlarning maʼnaviy-axloqiy jihatdan yuztuban ketishlariga bogʻlab talqin qilindi” [3,190].

Adabiyotshunos Mashhura Sheraliyeva shoʻro hokimiyati davrida adabiyotda taʼqibchi – qurbon – xaloskor arxetipi aks etganini taʼkidlaydi [3,190]. Unga koʻra oʻz mansabini suiisteʼmol qilgan amaldorlar taʼqibchi, amaldorlar zugʻumi ostida ezilgan xalq – qurbon, shoʻro tuzumi esa “xaloskor” sifatida talqin qilingan. Ushbu tendensiya “Oqqushlar, oppoq qushlar” romanida ham aynan uchraydi: Muzaffar Farmonov – taʼqibchi, Shorahim shovvoz – qurbon, Ivan Xaritonovich Beloborodov esa shoʻro tuzumi vakili sifatida xaloskor pozitsiyada aks etgan.

Umuman olganda, har ikki asardagi uch doʻst arxetipi yozuvchining badiiy niyatini toʻlaqonli ifodalash, mavjud voqelikni taʼsirchan tasvirlash, oddiy xalqning mehnatsevarligini madh etishga xizmat qilgani bilan ahamiyatlidir.

#### **Adabiyotlar:**

1. Қуронов Д. ва бошқалар. Адабиётшунослик луғати. Т.: «Akademnashr», 2013
2. Жаббор Эшонкул. Миф ва бадий тафаккур. Т.: «Фан», 2019.
3. Шералиева М. Ҳозирги ўзбек насрида киноя. Т.: «Akademnashr», 2016
4. Ёқубов О. “Эр бошига иш тушса...”. Роман. [www.ziyouz.com](http://www.ziyouz.com) kutubxonasi
5. Ёқубов О. “Оққушлар, оппоқ қушлар”. Роман. Sharq yulduzi. 1986-yil. 5-6-7-son.

